

東

華

錄

東華錄

臣王先謙敬

臣周淪蕃恭校

康熙二十九年庚午春正月辛丑諭內大臣等朕於國家政務竭力勤求是非自任從不委於羣下如遷移吳逆之事索額圖奏稱建議之人應請正法朕堅持獨斷必令遷移彼時十三省用兵數載天下大事皆朕一人獨任亦曾推諉爾等乎前年湖廣兵叛眾議紛紜朕謂此亦何難遂命綠旗兵丁卽行剿滅又鄂羅斯之事滿漢諸臣咸謂彼距中國道遠難以成功朕謂此事斷不可中止卽遣大臣前往遵朕指示而行鄂羅斯隨卽款服朕未嘗自伐其功但不似爾等稍有功績卽有人代爲表揚也朕乃萬姓之主惟以兆庶未安此衷不能稍釋至於無知之人妄生議論朕毫不介

意也○癸卯諭大學士等戶部尙書麻爾圖爲人甚懦不能如顧八代蘇赫各陳己見惟聽人之言而行著帶原降三級再降五級隨旗效力○諭戶部朕撫御區宇夙夜孜孜惟期厚民之生使漸登殷阜重念食爲民天必蓋藏素裕而後水旱無虞曾經特頒諭旨著各地方大吏督率有司曉諭小民務令多積米糧俾俯仰有資凶荒可備已經通行其各省徧設常平及義倉社倉勸諭捐輸米穀亦有旨允行後復有旨常平等倉積穀關係最爲緊要見今某省實心奉行某省奉行不力著再行各該督撫確察具奏朕於積貯一事申飭不啻再三藉令所在官司能俱體朕心實有儲蓄何至如直隸偶罹旱災輒爲補苴之術嗣後直省總督巡撫及司道府州縣官員務宜恪遵屢次諭旨切實舉行俾家有餘糧倉庾充物以副朕愛養生民至意如有仍前玩愒苟圖塞責漫無積貯

者將該管官員及總督巡撫一併從重治罪○甲辰諭戶部朕惟
阜民之道端在重農必東作功勤然後西成有賴畿輔地方去歲
荒歉已經蠲免錢糧特發帑金兼支倉粟賑濟雖小民餬口有資
其籽粒牛具恐多匱乏今時屆首春田功肇始若弗經營措給將
誤俶載之期播種不齊倉箱何望直隸被災州縣衛所窮民有不
能自備牛種等項者該府督率有司勸諭捐輸及時分行助給務
令田疇徧得耕耨毋致稍有荒蕪八旗官兵皆倚屯莊收穫用以
資生若有被災貧乏耕作無力者該都統等通行各該佐領酌量
飲助牛種所有莊田勿致播種後時以副朕敦本勸農愛養兵民
至意○己酉大學士等奏前者 皇上以前明宮殿樓亭門名開
載一摺並 慈甯宮 甯壽宮 乾清宮妃嬪宮人及老嫗數目
摺子發出令臣等觀看並鈔錄存貯衙門又奉諭旨朕以天旱欲

省宮人及所用器物詳加查察因自來未嘗有餘故不能再減爾等將前明宮中每年所用銀兩及金花鋪墊銀兩數目亦爲察閱臣等察前明宮內每年用金花銀共九十六萬九千四百餘兩今悉已充餉又察前明光祿寺每年送內所用各項錢糧二十四萬餘兩今每年止用三萬餘兩每年木柴二千六百八十六萬餘斤今止用六七百萬斤每年用紅螺等炭共一千二百八萬餘斤今止用百萬餘斤各宮牀帳輿轎花毯等每年共用銀二萬八千二百餘兩今俱不用又察前明宮殿樓亭門數共七百八十六座今以本朝宮殿數目較之不及前明十分之一至前明各宮殿九層基址牆垣俱用臨清甄木料俱用柟木今禁中修造房屋出於斷不可已非但基址未嘗用臨清甄凡一切牆垣俱用尋常甄料所用木植亦惟松木而已臣等以所察各條並 皇上發下摺子令

九卿詹事掌印不掌印科道官員徧觀諸臣皆曰 皇上凡百擯

節儉約臣等向所共知但未能詳悉今觀事事減省至矣極矣又

禮云天子后立六宮三夫人九嬪二十七世婦八十一御妻此皆

有名數者至所使宮人婦女以數千計唐太宗乃有唐令主觀其

一次遣發宮人已及三千則其餘更有數千人可知今除 慈甯

宮 甯壽宮外 乾清宮妃嬪以下使令老嫗灑掃宮女以上合

計止一百三十四人可謂至少不獨三代以下所無雖三代以上

亦未有如此者 皇上節儉盛德誠超邁千古矣○調蘇赫爲戶

部尙書以席柱爲工部尙書由督捕侍郎遷○以王澤宏爲內閣學士由

詹事遷 ○九卿等奏 皇上因天時亢旱宵旰焦勞 聖容清減恭

請調攝 聖躬以慰中外臣民之望得旨朕自臨御以來夙夜兢

兢勤求治理念切民依冀登安阜去歲畿輔旱荒雖經蠲租發帑

賑濟窮黎朕猶軫念未已卿等奏請調攝朕躬寬釋朕慮知道了卿等職任俱關重要各宜恪體朕衷持廉秉公實心盡職毋得營私結黨師生親友互相徇庇聽受屬託遇事推諉自圖便安務期於國計民生實有神益該部知道○庚戌以布彥圖爲內閣學士

由郎中選

○兵部奏原任雲南總督趙良棟遵旨將隨征周應泰等效

力處察明咨部並求將隨征之人除周應泰等外其餘未經題敘者亦許其察明具奏得旨趙良棟首倡進取四川又直抵雲南省城止率伊標官兵奮勇克取得勝橋等要地逼近城郭立營勞績茂著所屬官員亦俱同心隨征效力此奏內事情著九卿詹事科道會議具奏○癸丑上幸南苑行圍○以項一經爲貴州按察使由河南南汝道遷○命賑山西太原大同饑○甲寅直隸巡撫于成龍以井陘道員缺保舉湖廣武昌府知府武廷适漢陽府知府戴夢

熊黃州府知府王輔請加揀用部覆無庸議得旨用人之權關繫最爲重大于成龍收羅別省官員之心破壞定例將會經超擢歷年未久如許官員保題爾部不以爲非但稱無庸議殊屬不合且旣云直隸好官甚多今並不能拯救饑民頻多流散如此則平日才能所辦何事武廷适等升轉著停止令其在任久遠效力○丙辰福建巡撫張仲舉奏宋儒朱熹祖籍江南徽州府之婺源其父朱松厯官閩土遂家於閩故有閩徽二派前明有世襲五經博士二員分主閩徽祀事今據朱濬呈稱係朱熹十八世嫡孫籲請承襲查舊典朱熹裔原有博士二員請將朱濬承襲五經博士以主閩派祀事下部議行○丁巳 上還宮○戶部議覆直隸巡撫于成龍奏直屬清苑等州縣賑濟饑民若米穀不敷請動正項錢糧賑濟應如所請又奏稱未報成災州縣間有饑饉民人請一體議

賑應無庸議得旨未報成災州縣饑民著照該撫所題賑濟餘依
議○己未調席珠爲督捕侍郎轉噶世圖爲刑部左侍郎以噶爾
泰爲刑部右侍郎由通政使遷○以江西布政使王樸爲順天府府尹
○庚申喀爾喀土謝圖汗以所部六千餘人乏食請賑部議不准
上命以獨石口倉粟每戶給以四斗遣理藩院戶部司官各一
員會同土謝圖汗監視散給又車臣汗澤卜尊丹巴胡土克圖等
俱以乏食來告前後千萬計上皆命按口給之○上因噶爾
丹肆掠喀爾喀命理藩院侍郎文達至喀爾喀墨爾根濟農所確
覘噶爾丹情形

二月癸亥朔予故倉場侍郎洪尼喀祭葬○甲子議政王大臣等
遵旨議覆安親王岳樂薨逝查順治八年岳樂襲封伊父郡王順
治十四年恩封親王冊內並無世襲字樣今岳樂之子馬爾渾仍

應封爲安郡王得旨馬爾渾著襲封安郡王○以盧崇興爲江西

布政使

由廣西按察使遷

○乙丑諭內閣九卿詹事科道等昨歲畿輔荒

歉朕慮民食艱難或至流離失所旣蠲除田租復特發帑金三十萬兩並動支常平等倉粟令該撫徧行賑貸蓋期災黎得所毋使離散也今聞通衢相近之民雖已獲霑恩澤而僻壤窮簷究不能以自存至於越鄉去土者甚眾夫小民流移若如此則司牧大吏所賑救者安在耶前所發三十萬帑金未審如何散給所在人民有無轉徙應遣部院大臣往加詳察至於四方流民率多就食京師今年五城粥廠雖倍給銀米寬其日期但恐饑氓漸集無以徧贈罔克均霑恩惠宜增設粥廠擇各部滿漢賢能司官俾親賑焉其會議以聞尋議覆遣部院堂官分爲四路察勘賑不實者參劾五城粥廠再添設五處各遣賢能司官親往散給每日給米二十

石銀十兩並前五城原設粥廠俱令散至六月終止得旨著侍郎索阿和阿山席珠齊稽李振裕李光地王維珍徐廷璽分四路馳往巡察並遣滿漢賢能司官於五城增設粥廠賑濟○諭大學士等爾等所進明史朕已詳閱遠過宋元諸史矣凡編纂史書務宜考覈精詳不可疏漏朕於明代實錄詳悉披覽宣德以前尙覺可觀至宣德後頗多譌謬不可不察○丙寅 上啟鑾謁 陵○己巳 上謁 暫安奉殿 孝陵至 仁孝皇后 孝昭皇后 孝懿皇后陵奠酒○戶部遵旨議奏八旗不能贍養之莊屯人口及窮官護軍撥什庫兵等之莊屯人口共二萬二千四百二十八人每人給米一石至於子身寡婦退甲護軍撥什庫及無馬甲止給一兩錢糧者其家口莊屯人口共六萬三千七百一十九人每人亦給米一石得旨此等人口俱應給米糧可令速給之○庚午

上謁 暫安奉殿 孝陵奠酒回鑾○先是直隸地方雨雪未敷

上軫念民生日夜焦勞沿途見耕種農民卽遣人訪問是日自
早至夜半時雨大沛 天顏有喜顧扈從諸王大臣曰得此雨澤
既種之田固可發生未種之田亦可耕種朕甚喜慰諒爾等之心
亦同也○辛未命理藩院尙書阿喇尼左都御史馬齊爲議政大
臣舊例理藩院尙書左都御史皆不與議政至是著爲令○戶部
議准浙江巡撫張鵬翮奏定海山卽古昌國縣原有富都金塘蓬
萊安期四鄉至明代去三鄉止存富都卽今之定海山茲據民金
廷清等認墾金塘蓬萊二鄉田地應准其開墾成熟照例起科從
之○癸酉 上還京師○甲戌 上御經筵○內閣九卿詹事科
道等以雨澤霑足具奏稱慶 上曰諸臣稱雨澤霑足固當歡悅
但去年大旱民困未蘇其填溝壑者不知凡幾矣昔漢文帝爲三

代以下令主賈誼猶以處厝火積薪之上而謂無危爲喻以今較之如火已然可無慮乎且今雖得雨不知夏秋若何其當遠慮深思愈加軫恤何得稱慶○乙亥大學士等遵諭問九卿河工官員應否揀選補授據九卿云河工事宜應用諳練人員向因河臣揀選題補恐生屬託之弊故臣等議停今思河務甚爲緊要請仍令河臣題補 上曰河工爲漕運民生所繫凡應修之處若不豫修則河隄一決害民甚大或所修不固一經潰決監修官屬獲罪非輕是職司河務官員所得者少所失者多爲利則輕爲害則重自今河道官員可令該督揀選補用○調李鈞爲廣西按察使以王毓賢爲湖北按察使

由山西河東道遷

○己卯江南江西總督傅拉塔奏

江南百姓感戴

聖恩起造龍亭建立石碑其碑文進呈

御覽

上曰蠲免錢糧原欲使小民物力稍舒漸登殷阜前已頒諭旨

民間建立碑亭頌揚德意雖出羣黎愛戴之誠但恐致煩民力嗣後地方官員不得借端修葺碑亭以滋擾累○命發常平倉穀賑濟江南邳州睢甯等八州縣並徐州衛被水饑民○壬午議政王大臣等會議安親王岳樂之子馬爾渾已襲封郡王查定例親王一子封世子其餘子封貝勒郡王一子封長子其餘子封貝子又親王庶出子授爲輔國將軍郡王庶出子授爲奉國將軍岳樂所封親王並非世襲其子岳希原封僖郡王袁端原封勤郡王吳爾占原封貝勒塞冷額塞布禮原授輔國將軍塞冷額之子僧額原授奉國將軍俱照岳樂親王之爵封授似屬太過今馬爾渾既襲郡王應照定例將岳希袁端吳爾占封爲貝子塞冷額塞布禮授三等奉國將軍僧額授奉恩將軍得旨岳希仍留郡王其子襲封時應照貝子例封授袁端吳爾占著封爲貝子塞冷額塞布禮仍

留原職○甲申九卿等議覆原任雲南貴州總督趙良棟親領兵馬在雲南地方攻取城池勞績顯著應作何加恩伏候 上裁其所題白守仁等止稱隨征效力並未照例指名保題應移咨趙良棟令其詳察俟保題咨送到部注冊錄用瞿洪升張友成等雖投誠後有效力加功之處例不應用其所請注冊錄用無庸議得旨趙良棟由四川進雲南時破賊取城效力甚多可給與拜他喇布勒哈番瞿洪升張友成等亦同伊行走俱准其錄用餘依議○丁亥轉李振裕爲吏部左侍郎調趙士麟爲吏部右侍郎由督捕調○戊子以陳廷敬爲左都御史原任吏部尙書

三月壬辰朔戶部議覆直隸巡撫于成龍巡鹽御史江繁奏請蠲新增天津鹽引課餉查康熙十七年御史傅廷俊條奏增加遵行已久應無庸議得旨新增天津鹽引可如該撫等所題蠲免○禮

部右侍郎顧汧丁父憂命回籍守制○以許三禮爲督捕侍郎由左

副都御史遷

○諭理藩院尙書阿喇尼等今喀爾喀汗等率眾來降應

令四十九旗與之會同大閱其令議政王大臣等集議尋議覆

皇上聲教遠被喀爾喀土謝圖汗車臣汗及諸濟農台吉等皆傾

心來歸應出臨大閱永使安輯其四十九旗會閱之事今歲暫停

俟來年照例與喀爾喀會閱得旨著於七月舉行餘如議○乙未

禮部等衙門議准御史徐樹穀奏請纂修 三朝國史得旨 太

祖 太宗肇造丕基永垂謨烈神功聖德千古莫倫 世祖統一

寰區宏開景運治化綦隆光昭天壤且當時勳舊翊贊勤勞若不

及時彙輯成書恐歲久人湮諸臣事蹟致有闕畧依議卽行編纂

昭示奕禩應行事宜著內閣翰林院會同詳議具奏○庚子以王

澤宏爲禮部右侍郎

由內閣學士遷

王士正爲左副都御史

由少詹事遷

○壬

寅伊拉古克三胡土克圖奏臣等十二月初五日至他米爾之北齊勞圖河河之兩岸俱有噶爾丹兵馬蹤迹與濟隆胡土克圖尾之前往令商南多爾濟歸奏求給行糧運至軍前 上命運殺虎口倉米三十石隨商南多爾濟前往○癸卯先是理藩院以大閱事奏遣司官二員乘驛赴阿南達文達所豫調俄僮土喇等處駐紮之喀爾喀台吉集兵設站以待至是商南多爾濟歸奏噶爾丹情形 上諭理藩院尙書阿喇尼爾等昨議遣司官二員尙未前往今著一員至鄂爾多斯發兵一千五百以貝勒松阿喇布率之一員至歸化城發兵五百喀爾喀達爾漢親王及四子部落共發兵一千以達爾漢親王諾內率之檄侍郎文達令豫發喀爾喀墨爾根濟農敖巴額爾克阿海蘇泰伊爾登台吉之兵共三千名以待以蘇泰伊爾登拖多額爾得尼率之偕調兵司官往文達所齎

三月糧隨文達赴土喇河仍自京遣大臣一員與文達阿南達偕統其軍爾同紀爾他布速赴阿南達所住之地先檄阿南達來京再詣文達所自屯軍之地至汎界酌派喀爾喀人等安設驛站○命都統額赫納護軍統領馬喇前鋒統領碩鼐等出征 上諭朕已遣侍郎文達往調喀爾喀親王諾內等兵共三千爾等至歸化城與文達卽率其兵赴土喇與阿喇尼紀爾他布等會爾等習於兵事機宜無俟朕言其就水草善地將養馬駝前進仍各賜內廐馬駝以行○乙巳侍郎王維珍等奏遵旨查閱直隸地方未被災處已皆得雨收成可望其已被災者自沿途大路以至鄉僻山村徧行查勘賑過饑民萬萬均荷 皇恩兼以 聖誠格天雨雪時降農事漸徧可待麥秋並無流散饑斃之人所至村莊老幼男婦百十爲羣望 闕叩謝感激歡呼難以言盡或立碑勒文或焚香

祝 聖此則愚氓感恩激切出於至情者也報聞○辛亥戶部議准雲南巡撫王繼文奏雲南黑井鹽課前因官兵眾多吳逆題請加增今全滇恢復之後逆屬家口盡行遣發投誠人員安插各省食鹽甚少此項加增課銀懇祈豁免從之○壬子以田喜霽爲內閣學士由少詹事遷○癸丑冊封和碩純禧公主下嫁科爾沁台吉般迪授般迪爲和碩額駙○丁巳直隸巡撫于成龍奏前奉部撥賑濟銀三十萬兩尙不敷用請續發銀兩以備接賑部議不准行

上命再撥銀五萬兩散賑○工部議覆漕運總督董訥奏運河沿北一帶淺阻漕艘不能速行請放南旺湖水以裨漕運 上諭大學士等南旺湖之水自來流入運河朕去歲南巡回鑾時沿隄而行細閱河勢知南旺湖之水至分水龍王廟分流俱入南北運河當日始建隄岸之人經營甚善今若使南旺湖之水盡入北流則

南運河將至水淺矣可傳從前勘河諸臣及靳輔問明回奏○戊午大學士等奏臣等遵旨問從前勘河諸臣暨靳輔等據勘河諸臣云我等忽忽行過所見不甚詳明靳輔云南旺湖水若使之偏入北河目前雖少有裨益及糧艘齊集時南運河必致水淺 聖見誠然 上曰此湖水可令總河詳議善後之圖以裨漕運應開應閉亦令酌行○庚申 上以康熙二十四二十五兩年內所閱通鑑 御製論斷一百有七則命贊善勵杜訥交起居注館記注○辛酉刑部左侍郎噶世圖以老疾乞休允之

夏四月癸亥賑察哈爾及八旗遊牧蒙古○甲子諭內大臣公舅舅佟國維等比聞厄魯特策妄阿喇布坦阿奴與噶爾丹交惡情事未悉應頒敕書訊其故並量加恩賚令理藩院擇賢能司官一員送往嘉峪關交待讀學士達虎卽令其前往宣諭達虎事竣著

乘驛來京此遣去官及達虎同事之主事奔璽仍留邊外偵取消
息不時報聞賜策妄阿喇布坦阿奴敕曰朕撫育萬邦率土之人
皆欲其協和安輯今聞爾等與噶爾丹不和致啟爭端爾厄魯特
向修職貢恭順惟謹今乃內自交惡必有其因朕甚憐之遠聞之
言虛實難據侍讀學士達虎齋御用各色段二十疋賜策妄阿喇
布坦阿奴其以爾等交惡之由明告使臣毋隱○乙丑轉噶爾泰
爲刑部左侍郎以傅臘塔爲刑部右侍郎由通政使遷○己巳察賑直
隸營汛兵家口○乙亥諭大學士等此時亢旱米價騰貴八旗官
兵秋季應支米石可豫給其半○諭刑部天時旱乾囹圄重罪已
令清理今所在祈禱望雨甚殷除死罪以外凡拘禁枷號鞭責等
罪咸從寬釋之○戊寅諭倉場侍郎凱音布原任河道總督靳輔
山東河道自分水龍王廟以南流入運河之水不一而足舟行無

阻分水龍王廟以北匯入運河者惟河南衛河而已並無別渠相濟南旺所蓄之水又不能多常致淤淺阻滯今將駱馬湖之水不令其自禹王臺流入沐河俾駱馬湖之水蓄貯無洩於運道有無裨益至駱馬湖與南旺等湖相距地勢高低如何山東東阿縣之鹽河及別河有可通入運河者否河南衛河之外有別河可資以疏入運河者否爾等訪其地諳練之人委曲諮詢若有可措施之處親加詳閱繪圖來奏○己卯左都御史陳廷敬奏言官建白不得摭拾細務 上曰設立科道原欲其建言也至條奏之事是否可行自有裁定若必大事始言則言官難分事之大小以致進言者少非所以集眾思廣忠益也○詔盛京錦州開平遼陽蓋州實倉儲○甲申禮部議覆五經博士孔毓埏奏請建子思專廟應如所請照顏曾孟例於闕里孔廟西北隅建立專廟從之○丁亥

大清會典成

御製序文

○戊子以鄔赫爲盛京刑部侍郎

由大理寺

卿

○己丑先是京師雨澤未敷

上憂之是日大雨四野霑足

上出正陽門至南苑觀禾諭大學士等保定等處未知雨足否可

遣戶部司官善馳馬者卽往察勘○庚寅賑甘肅靖遠衛旱災

五月辛卯朔吏部以行取知縣事請旨諭行取知縣以科道用者

甚多科道職任關繫緊要著九卿各以平昔所知學問優長品行

可用者面同舉奏尋戶部尙書王隲舉清苑縣知縣邵嗣堯清廉

慈惠兵部尙書李天馥舉三河縣知縣彭鵬靈壽縣知縣陸隴其

居官有聲

上諭大學士等適九卿列薦有邵嗣堯陸隴其彭鵬

三人其服官廉介朕所素知爾漢大學士亦有知者否梁清標奏

曰三人允稱廉吏徐元文奏曰以臣所聞湖廣麻城縣知縣趙蒼

壁牧民有聲聞武昌兵譟時所在州縣官俱棄城潛去惟蒼壁安

撫百姓修城豫備 上曰彭鵬邵嗣堯陸隴其趙蒼璧俱准行取
○甲午禮部等衙門奏各省典試官命下後限五日起程如故遲
不行者科道官題參交部嚴行處分從之○辛丑刑部等衙門議
覆江南江西總督傅拉塔奏臣察審沭陽縣民周廷鑑叩閭告太
常寺少卿胡簡敬父子兄弟一門濟惡霸占民人妻女田產誣良
爲盜等事俱係情實胡簡敬應革職徒三年胡旭胡敷世俱應絞
胡簡尤等俱擬杖徒巡撫洪之傑奉旨交審事件不速行審訊反
收胡簡敬訴詞明係徇情應降三級調用 上曰胡簡敬等一門
濟惡霸占民人妻女田產誣告盜情致斃人命閩縣之人遭其毒
害種種惡蹟昭然有據督撫不行舉發科道漫無糾參無非畏其
勢力瞻徇情面今已告發審實若不嚴加處分立置重典何以爲
直隸各省不法紳衿積惡豪強之戒胡簡敬等應於彼處正法治

罪巡撫洪之傑爲地方大吏平日既不能體察糾參及經告發又不速行審治遷延徇庇殊負委任應革職著九卿詹事科道會同議奏○喀爾喀額爾克阿海巴郎奏臣父扎薩克圖汗喀爾喀七旗之長也爲左翼土謝圖汗所敗屬裔分散臣等又爲厄魯特所收棲於阿爾泰山之南今乘間得出來投伏乞 聖恩賑恤恩養俾得繼立下議政王大臣等議尋議覆扎薩克圖汗厯世恭順職貢有年似應繼立查今年眾喀爾喀來降已定期會閱其所請應於會閱處定奪從之○乙巳盛京刑部侍郎卹赫陞辭諭聞盛京地方屬託之事甚多爾到任後須奉公而行○諭大學士等河道所關至爲重大一二年來雨水稀少管河官視河道爲常事今年雨水似多可馳諭總河嚴飭該管官晝夜防視務保河隄無虞○丁巳 上幸南苑行圍○戊午 上還宮○己未尙書阿喇尼等

奏郎中馬迪報稱自烏爾扎河前踰一日程有厄魯特列營狀

上諭八旗兵及礮著卽擇日啟行阿南達等不必待額赫納卽載礮以往其額赫納及科爾沁巴林翁牛特兵俱星馳赴阿喇尼軍
六月乙丑九卿遵旨議覆原任太常寺少卿胡簡敬一門濟惡種種不法胡簡敬應坐光棍爲首例立決其倚勢作惡之胡旭胡敷世應論絞洪之傑身爲封疆大臣不行參奏奉旨審理又不速結徇情護庇稽延時日應革職得旨胡旭胡敷世依擬應絞令監候秋後處決胡簡敬從寬免死並伊子弟俱發河南安插開墾荒地洪之傑著卽革職餘依議○癸酉江南江西總督傅拉塔奏參大學士徐元文原任刑部尙書徐乾學縱放子姪家人等招搖納賄爭利害民所行劣迹共十五款江蘇巡撫洪之傑趨附獻媚甚爲溺職得旨所參本內各款從寬免其審明徐元文著休致回籍○

調鄭端爲江蘇巡撫

由偏沅調

○山東巡撫佛倫奏東省累民之事第

一賦役不均凡紳衿貢監戶下均免雜差以致偏累小民富豪之家田連阡陌不應差役遂有奸猾百姓將田畝詭寄紳衿貢監戶下希圖避役積習相沿牢不可破若不力爲禁革小民困苦何日得除請通限二月之內將從前詭寄田畝許其自首盡行退出嗣後凡紳衿等田地與民人一例當差庶積弊一清小民得免偏枯之累得旨紳衿等優免丁銀原有定例其鄉紳豪強詭寄濫免以致徭役不均偏累小民積弊已久今該撫所奏改正釐剔具見實心任事並不瞻徇直省應一體行九卿詹事科道會同確議具奏

○戊寅尙書阿喇尼等奏偵探厄魯特兵駐紮克魯倫之阿爾灘額墨爾地方臣等欲待大兵而行恐厄魯特兵進躡昆都倫博碩克圖沿烏爾順河至喀爾喀河地方烏爾順河距喀爾喀河甚近

喀爾喀河距汎界僅一日程臣軍若往波衣爾之地慮反出其後
以此竟赴波衣爾之南他奔他什海以禦之奏至 上諭噶爾丹
踰枯倫波衣深入事關緊要理宜豫備王沙津如未起行令率所
調科爾沁兵往前年紀爾他布等駐防之地備之若沙津已起行
著達爾漢親王班第率兵往備之其敖漢土默特貝勒厄爾德木
圖公烏忒巴喇等旗兵之未調者令住備達爾腦爾前所派出每
佐領禁兵二名作速遣行再每佐領下應派護軍驍騎各五名豫
備以待其以阿喇尼奏速檄額赫納知之著議政王大臣集議尋
議應如敕諭令理藩院遣官馳驛前往 上曰蒙古兵令攜兩月
行糧其敖漢柰曼科爾沁土默特兵令貝勒厄爾德木圖公烏忒
巴喇統之其率科爾沁兵往紀爾他布駐防之地令內大臣蘇爾
達率前次將校乘驛前往其再發之軍每佐領撥護軍五名驍騎

三名包衣佐領兵亦照此派發令都統宗室喇克達彭春護軍統領苗齊納楊岱副都統扎木素海瀾塞赫康喀喇統之其副都統邁圖署爲前鋒統領前去再派去漢軍都統公舅舅佟國綱都統諾邁凡派發火器營兵之事令彼請旨再派諸王從征軍行日期交欽天監選擇令前所撥兵輕裝於初旬速行其輜重令每翼留官校押往尋命康親王傑書恪慎郡王岳希從征○庚辰先是福建安溪縣革職知縣孫鏞首告福建巡撫張仲舉布政司張永茂等將藩庫錢糧侵蝕肥己一案奉旨差郎中吳爾泰等往福建審理至是浙江福建總督興永朝奏郎中吳爾泰等將張仲舉等摘印看守請開缺另補 上曰此事極爲重大吳爾泰等乃一司官將此事妄爲張大亦未可定著內閣學士郭世隆前往察審○辛巳諭兵部噶爾丹追喀爾喀已進汎界朕將親往視師從征諸王

出喜峰口公蘇努等所領之軍隨朕行令諸王先朕進發先檄知
尙書阿喇尼等理藩院遣司官星馳以往其令議政王大臣集議
尋議諸王軍以七月初四日起行其從征之兵每翼遣副都統一

員 駕發日期初六日爲宜○癸未以于養志爲偏沅巡撫

由湖南廣布

政使

卞永譽爲福建巡撫

由浙江布政使遷

○甲申

上將出師遣使賜

噶爾丹敕曰朕統御宇內懷柔萬邦惟願率土生民咸得其所相
與協和無分中外夫兵凶器戰危事互相仇怨無有已時非計也
故遣尙書阿喇尼散秩大臣吳巴錫扎薩克大喇嘛阿齊圖綽爾
濟一等侍衛阿南達傳諭令罷兵息戰爾回奏云聖主施仁撫育
令共相協和以享康泰我亦與焉伏願指示安樂之策聞聖上將
盡驅出喀爾喀之人不勝懼怖不敢以殺我弟多爾濟扎卜爲憾
所奏甚明今乃聞爾復興兵伐喀爾喀故遣尙書阿喇尼防境內

之不靖者今烏朱穆秦遣使至爾所爾言中華與我一道同軌我不敢犯界內地方而又闌入汎界掠烏朱穆秦人畜是背前言而壞舊好也且朕前所遣伊拉古克三胡土克圖等至今不歸爾誠何意耶今遣員外郎阿爾必特祐簣賴齋敕諭爾爾尙可以改圖爾旣入邊我諸部王及貝勒台吉等行且興兵擊爾故亦遣來使止之卹爾至矣其速給還所掠歸我使人爾其明白回奏是日卽以遣使諭噶爾丹事檄知諸軍○乙酉以張玉書爲文華殿大學士兼戶部尙書由禮部尙書遷○丁亥九卿議直隸各省鄉紳名下田地應照山東省與民人一例差徭 上曰山東省清釐賦役可如議行其直隸各省令各該督撫確議具奏○時噶爾丹沿喀爾喀河而進追及昆都倫博碩克圖昆都倫不能禦僅以身免阿喇尼等聞噶爾丹駐兵索約爾濟河連夜率兵往襲之至則噶爾丹已向

烏爾會河去矣具奏以聞 上命阿喇尼等仍躡厄魯特後偵其所至奏報額赫納等軍到且勿與戰俟達爾漢親王班第兵盛京烏喇滿洲兵齊集同夾擊之如噶爾丹潰敗令阿喇尼等窮追便宜行事檄諸軍量馬力疾行齊會形勝之地以俟禁軍○戊子諭議政王大臣等康親王傑書恪慎郡王岳希副都統海篤牛尼有率前所發驍騎每佐領各一名於初二日起行出張家口屯歸化城如大同兵可用聽王等隨宜調遣其厄魯特貿易人馬匹託言乘用盡收之直隸巡撫率兵一千駐遵化西安將軍尼雅翰副都統巴賽柏天都率滿洲兵二千漢軍兵一千屯甯夏綠旗兵亦令豫備○尙書阿喇尼等奏與厄魯特戰於烏爾會河地方厄魯特兵二萬餘掠烏朱穆素男女牲畜輜重徐行溯水上流遊牧臣等偵知之分兵二隊乘夜往襲二十一日昧爽於烏爾會河地方及

其營令所選蒙古勇士二百餘攻之喀爾喀兵爭取其子女牲畜陣動不能止遂退厄魯特分兩翼陣而立我軍次隊繼進厄魯特發烏槍軍退前隊兵及喀爾喀兵復進喀爾喀畏其烏槍先卻諸扎薩克兵力薄亦退厄魯特增兵從山上繞出我左右我軍因火器營未至不能進遂歛歸駐鄂爾折伊圖以俟諸軍 上以示議政王大臣尋部議阿喇尼紀爾他布等違命輕戰以致失利俱應革職同往官員俱革職得旨阿喇尼紀爾他布俱革去議政降四級調用紀爾他布仍留佐領餘如議○時噶爾丹歸我使商南多爾濟以其情陳奏 上起滿丕爲理藩院郎中鄂齊理爲員外郎往諭噶爾丹命之曰爾等往諭噶爾丹據商南多爾濟來奏言尙書阿喇尼等不請旨而卽擊汝非本朝意也阿喇尼防守地方汝闌入汎界肆行劫掠職寄所關不得不戰 皇上恐諸扎薩克擊

汝前已遣使諭止之今又遣我等來諭商南多爾濟奏汝言以中華一道同軌我但索土謝圖汗澤卜尊丹巴而已至邊境之內不敢纖芥犯而我尙書阿喇尼等遽加以兵甚爲過當其以此曉諭之○己丑喀爾喀扎薩克台吉額爾克阿海等率千餘人刼掠學士布彥圖以聞 上諭發察哈爾兵備之遣軍校檄阿喇尼令與額赫納阿南達兵會毋以前戰未捷遽懷退怯其收集兵馬嚴行警哨如各扎薩克之兵不足恃皆令內移喀爾喀有橫行者禁輯之自古北口至西巴爾臺令兵部遣坐驛筆帖式設站自西巴爾臺至阿喇尼所令蒙古設站學士布彥圖設站畢撤張家口驛其坐驛筆帖式軍校赴伊處酌用兵部侍郎沙穆哈前往安驛直至布彥圖所令巡撫干成龍星速來京整理近京驛站其標下所調之兵及天津鎮標兵俱選賢能將弁率往遵化兵部遣官疾馳往

諭○是月免河南開封等四府旱災田租

東華錄

康熙四十六

臣王先謙敬編

臣周潤蕃恭校

秋七月庚寅朔調張英爲禮部尙書

由工部調

○辛卯噶爾丹深入烏

朱穆秦地

上命裕親王福全爲撫遠大將軍皇子允禔副之出

古北口恭親王常甯爲安北大將軍簡親王雅布信郡王鄂扎副

之出喜峰口內大臣舅舅佟國綱佟國維內大臣索額圖明珠阿

密達都統蘇努喇克達彭春阿席坦諾邁護軍統領苗齊納楊岱

前鋒統領班達爾沙邁圖俱參贊軍務諸軍前發惟佟國維索額

圖明珠畱京俟大將軍至陰山馳往會之○壬辰以李鈞爲福建

布政使

由廣西按察使遷

李煒爲湖南布政使

由廣東按察使遷

馬如龍爲浙江

布政使

由按察使遷

張勳爲福建按察使

由湖廣按察使遷

○乙未撫遠大將

軍裕親王福全師行 上御太和門賜敕印出東直門送之○丙

申命阿密達阿喇尼阿南達等各率所部會裕親王福全軍○戊

戌以唐宗堯爲廣西按察使

由左江道遷

劉元勳爲廣東按察使

由山西河

東道遷

孫允恭爲浙江按察使

由金衢道遷

○諭內大臣舅舅佟國維等

朕夜來思及一事方欲傳諭適諾木齊岱來奏蘇爾達之語與朕意相符朕觀噶爾丹退回二宿之地似欲潛逃如俟京城大兵至始追之恐不及聞盛京烏喇兵俱已起行十日內卽到矣其令阿密達全軍及公蘇努軍中視有壯馬者選出卽簡出征大臣一員統領而往沿途擇水草善地剋期到彼如噶爾丹欲逃卽行追剿無失機會若彼來迎敵則我軍切勿亟行以待大兵姑遣人諭之曰汝闌入我汛界尙書阿喇尼等不得不迎戰汝向與天朝修貢通好此來追喀爾喀耳今喀爾喀劫奪我外藩肆行悖亂亦與我

朝相失聖上特遣和碩裕親王及皇子來與汝申明禮法自茲以往永定盟好汝不聞前者我朝出兵至鄂羅斯以禮和好不戰而歸乎汝其謹俟王及皇子之至如此往復遣使以羈縻之大兵可至阿喇尼等所有扎薩克兵及阿南達兵其馬既不堪用著阿南達親押火器速往與盛京烏喇科爾沁兵會阿南達所畱之兵著一人管轄駐於見居之地不時探報蘇努所餘之兵尾此軍後聯絡坐臺哨探其令議政王大臣集議尋議 上諭已極周詳其統領此軍之大臣及管轄阿南達所畱兵之人員恭候特簡 上曰著索額圖統領偕阿密達先往令阿密達及蘇爾達參酌而行索額圖阿密達前去則攜前鋒參領石圖與俱並精選前鋒兵帶往至則視其情形如彼能待則俟大軍而行不能待則遣人羈縻之必不得已則明諭之曰聖上遣皇兄及皇子與汝相見非惡意也

汝乃不俟而去非汝之不軌乎雖聖上戒勿戰我不汝貸也往復數四度盛京烏喇諸扎薩克兵且至力足以勝卽便宜行事如彼奔逃已遠不便往追則速奏以便撤兵蘇努及阿密達之軍俱令蘇努率之而往除阿南達等押礮及馬壯者前去外其馬不堪者酌畱令副都統扎木素噶爾瑪領之駐阿喇尼等原駐之地探噶爾丹聲息及額赫納軍情不時報聞並防禦就近地方作惡肆行之人其查努喀朱爾素亦酌量帶往調用索額圖取皇子允禔廢馬百匹乘以前去○己亥以陳廷敬爲工部尙書于成龍爲左都御史

由直隸巡撫遷

○壬寅噶爾丹遣達爾漢格隆奏喀爾喀吾讐也因

追彼闌入汛界向在 中華皇帝道法之中不敢妄行 上因賜

來使筵宴賞賚令齎敕歸諭之敕曰據爾使人達爾漢格隆陳奏具見敬慎惓誠朕統御天下重信義而賤欺誑前以七旗喀爾喀

彼此構怨與達賴喇嘛共議遣大臣諭和不意左翼興兵妄動朕弗之直也後喀爾喀爲爾所敗匍匐來歸朕念普濟眾生之意賜以米糧牲畜所全活者無算喀爾喀何利於朕而施恩若是皆朕不忍生民之顛沛故耳是年出盟方分別七旗曲直昭雪扎薩克圖汗之事欲仍前設立右翼議未及定爾兵已至乘虛驟入視守汛界者衣服出言不遜朕亦不深責六月二十五日遣員外郎阿爾必特祐等問故而阿喇尼等在邊以爾公然闌入汛界守邊責重不能容忍遽與爾戰朕甚非之六月二十九日復遣郎中滿丕齋敕諭爾豈有正事尙未議定即可言執土謝圖汗澤卜尊丹巴以畀汝乎此皆使臣設計脫身而爲此言也汝謂與達賴喇嘛道法爲一則當憐念眾生同心以安喀爾喀令七旗同享安樂以仰副朕意乃反肆殺戮拆人妻子離人骨肉闌入汛界掠及四佐領

之人揆之道法可若是行乎恐達賴喇嘛未必使汝爲此也西甯報至聞策妄阿喇布坦以汝罪告之達賴喇嘛將興兵伐汝夫興戎非美事也朕且將與達賴喇嘛共議調和而聞汝已駐兵烏爾會河故朕遣和碩裕親王及皇子大臣量發滿兵而往非討汝也欲定議耳前者遣大臣往鄂羅斯議事亦發兵往議畢而回汝所夙知也爲汝計其聽達賴喇嘛言罷兵息戰各享安樂旣合眾心亦易畢事如仍以前事爲辭妄行劫掠則壞敗名教自汝始矣○癸卯 上巡幸邊外啟鑾○諭都統瓦岱等據關保奏噶爾丹於六月二十七日遣發其使人及我撥什庫次日潛師遁去般弟蘇爾達等遣人躡視之噶爾丹兵果已逃去朕之欲幸此軍者以躬近行間便指示也今噶爾丹雖退而喀爾喀方且橫行劫掠驛遞及諸扎薩克馬畜衣服乘此大兵集會朕乃親往視師以靖喀爾

喀之橫肆俾知所畏忌事可一舉而定也○以郭世隆爲直隸巡

撫

由內閣
學士遷

○甲辰學士西拉奏員外郎阿爾必特祐筮賴奉使噶

爾丹不終使事半路私歸請誅之

上可其奏隨又諭大學士伊

桑阿等曰阿爾必特祐筮賴罪本應誅今暫免其死前遣去筆帖

式巴查爾竟未見噶爾丹而歸今俱帶之前去出口後或有差遣

之處亦未可定若能效力則貸其罪否則誅之○丙午 上駐蹕

古魯富爾堅嘉渾噶山○諭大學士伊桑阿尙書顧八代朕沿途

閱視見所踐田禾過於朕初時諭旨部中文量者惟恩格木噶山

以南過此並未丈量何地非朕赤子可令侍郎賽弼漢卽自口以

北至波瀨噶山凡所踐田禾作速明悉丈量○丁未命康親王傑

書等率兵往會裕親王福全軍○戊申扈從大臣侍衛等合詞奏

曰此地風高寒暑無定伏請 皇上回鑾移駐內地以養 聖躬

上諭朕躬雖覺違和畱駐數日俟稍愈卽往軍前相機調遣○
命恭親王常甯帥師會裕親王福全軍○己酉 上駐蹕博洛和
屯命簡親王雅布赴裕親王福全軍參贊軍務○庚戌內大臣伯
費揚古前鋒統領班達爾沙奉命赴科爾沁至布爾哈蘇圖地方
與科爾沁軍會費揚古等奏聞 上諭費揚古等不必與科爾沁
兵齊來令速赴裕親王軍並檄蘇爾達等知之○辛亥 上夜間
身熱心煩至黎明始得成寐諸大臣侍衛等不勝惶懼是夜俱集
行宮前○壬子清晨諸大臣侍衛等合詞跪奏此地日中甚熱夜
間甚涼寒燠不常兼以大風時至地方潮溼 聖體益覺違和此
間難於調攝懇 皇上卽日回鑾以養 聖躬 上猶未允諸大
臣侍衛等於行宮前長跪不起再三懇請 上曰此地寒燠不常
似難調攝爾等諄諄叩請朕暫且回鑾日間甚熱每日日落後徐

行二三十里可耳又諭扈從諸臣侍衛等朕來此地本欲剋期剿滅噶爾丹以清沙漠今以朕躬抱疾實難支撐不獲親滅此賊甚爲可恨至於歎息流涕隨命選擇肥壯馬匹分給隨駕火器營兵前鋒護軍令其馳赴大軍前是日回鑾駐蹕舍里烏朱○癸丑先是上以違和命皇太子允禔皇三子允祉馳驛前迎是日允禔允祉至行宮請安見聖體未甯天顏清減略無憂戚之意見於詞色上以允禔絕無忠愛君父之念心甚不懌令卽先回京師○甲寅諭署理藩院事左都御史馬齊學士西拉朕問二等侍衛吳達禪云喀爾喀土謝圖汗澤卜尊丹巴胡土克圖屬下貧不聊生者甚多可遣爾衙門司官一員至土謝圖汗處將至窮乏者帶至張家口外相宜處同口北道動支張家口所貯之米日給飯食其食米人及所需米數俟進京時奏聞○先是上諭裕

親王等今兵漸與敵近斥堠宜嚴明噶爾丹處應作何羈縻以待
盛京烏喇科爾沁之兵王等其遺之牛羊以老其銳氣疑其士卒
商南多爾濟諳晰情形可與商也至是裕親王福全奏臣隨遣濟
隆胡土克圖及噶爾丹之使偕驍騎校克寶圖原任員外郎筴賴
遺以羊百頭牛二十頭持臣及皇子書語之曰我與汝協護黃教
和好有年今汝追喀爾喀入我汛界 聖上特命我等論決此事
永久和好今汝使人言我汗已敬遵達賴喇嘛之諭夫講信修禮
所關重大此役既就則一切皆宜矣今將於何地會議以決大事
因貽書之便以牛羊爲餽贈臣等不知諸軍至何地可待則待之
如不可待則量力而進耳○予故盛京刑部侍郎吳什巴祭葬
八月己未朔日有食之○庚申先是 上遣阿爾必特祜等赴索
額圖軍前使於噶爾丹至是索額圖奏阿爾必特祜等歸偕濟隆

胡土克圖使人拉木扎木巴噶爾丹使人尊多伊格蘇爾至營問其情由阿爾必特祜等述噶爾丹之言曰所有情事已同滿丕等遣使上奏不復具奏但以書問王與皇子內大臣安請遵商南多爾濟所傳 明旨以土謝圖汗澤卜尊丹巴界我述濟隆之言曰達賴喇嘛所以遣我者爲 聖上與噶爾丹向來和好急欲定此大事以早復命耳此事非王及皇子內大臣親身就我或我親身來面議不能定也又視來人形狀甚覺倉皇有窺探大軍意厄魯特見至烏蘭滾地方覓山林深塹倚險結營又聞其祭旗誦經距我軍僅四十里報聞○辛酉撫遠大將軍裕親王福全等奏七月二十九日臣等聞厄魯特屯於烏蘭布通卽整列隊伍八月初一日黎明前進日中見敵設鹿角槍礮列兵徐進未時臨敵發槍礮擊之至山下見厄魯特於林內隔河高岸相拒橫臥羣駝以爲障

蔽自未時交戰至掌燈時左翼由山腰捲入大敗之斬殺甚多右翼進擊爲河崖淖泥所阻回至原處而立本欲盡滅餘賊但昏夜地險收兵徐退其噶爾丹死於亂兵與否俟查明另奏疏入得旨嘉獎○壬戌撫遠大將軍裕親王福全等奏八月初一日擊敗噶爾丹薄暮收軍次日卽前進剿殺餘寇見噶爾丹據險堅拒故使我將士暫息而噶爾丹適遣伊拉古克三胡土克圖來復理前說請以土謝圖汗澤卜尊丹巴界之且云一二日內濟隆胡土克圖卽來講禮修好臣等悉遵 聖諭數噶爾丹前後逆惡而遣之初四日濟隆果率其弟子七十餘人來言博碩克圖汗信伊拉古克三及商南多爾濟之言深入汛界部下無知搶掠人畜皆大非理聖上乃一統宇宙之主博碩克圖汗不過小部頭目何敢妄行但因索其仇土謝圖汗及澤卜尊丹巴致有此誤彼今亦無索土

謝圖汗之意但祈 聖上慨允以澤卜尊丹巴遣送其師達賴喇嘛榮光莫大矣臣等謂之曰土謝圖汗澤卜尊丹巴卽有罪愆

聖上自加罪責豈有因噶爾丹之言遂遣送達賴喇嘛之理且汝往來行說能保噶爾丹不乘閒奔逸掠我境內人民乎濟隆言王及諸大臣仰體 聖上仁心休征罷戰彼焉敢行劫亦斷不遠去臣等謂之曰汝雖保噶爾丹不敢妄行但我各路兵分行進剿遇厄魯特卽行掩擊必然之勢也今我等仰體 皇上好生許汝所請當發印文檄各路領軍諸王大臣卽止勿擊隨給濟隆等蟒袍先遣其弟子馳報噶爾丹臣等思噶爾丹乃狡詐之人雖不可全信但戰之次日屢遣人來必多窘迫臣等欲卽進剿則厄魯特據險堅拒俟其往來講解以待盛京烏喇科爾沁諸軍之至齊行夾擊如有可除之機斷不誤也 上命議政大臣集議尋議大將軍

王等旣大敗厄魯特乃不卽行勦滅明知濟隆行說以誤我軍而故聽之豈不坐失事機請敕大將軍王等作速追勦得旨出征諸王大臣當同心效力大將軍王與皇子失誤機宜眾大臣不正言抗拒軍律甚明歸時斷不姑宥此役所關甚鉅今科爾沁烏喇盛京之兵初四五間可至達爾腦爾矣若又失機會不進偪之王與大臣此行何所事耶○乙丑 上還京師○丙寅命都統希福赴撫遠大將軍裕親王軍前參贊軍務○辛未諭大學士等允禔聽信小人譏閒之言與裕親王不相和協妄生事端私行陳奏畱駐軍前必致債事著撤回京○癸酉先是撫遠大將軍裕親王福全奏噶爾丹迫於追襲自什拉穆楞河載水橫度大磧山連夜遁走於剛阿腦爾臣等欲追而馬力不能前進又恐噶爾丹去遠因與濟隆胡土克圖約使噶爾丹近我而止以禮定好遣侍衛吳丹護

軍參領塞爾濟等偕濟隆往諭之至是裕親王等又奏吳丹塞爾濟與濟隆帶噶爾丹使人達爾漢格隆西達額爾克寨桑持書至告曰噶爾丹跪於威靈佛前稽首誓曰若違此書惟佛鑒之其書詞云達賴喇嘛明鑒遣濟隆額爾德尼來責以禮法今儻蒙皇上惠好則自此不敢犯喀爾喀謹以印文爲驗臣等閱書未載誓詞仍遣濟隆等歸開諭噶爾丹增書誓詞許其歸好奏入上命議政王大臣集議尋議噶爾丹乃極狡詐之人屢遣人以立誓爲詞今又劫掠克西克騰之三佐領矣誓好不可深信蘇爾達等軍已到應立行剿滅但王等親在軍中事皆目擊應准所奏命噶爾丹堅誓而釋之王等仍率大軍駐彼探噶爾丹出邊遠去實音令蘇爾達軍照常防守從之○丙子撫遠大將軍裕親王福全等奏十一日遣伊拉古克三赴噶爾丹十五日齎噶爾丹奏章還其詞

曰伏蒙照鑒下情普使安全正在懽忭伊拉克古三來諭以禮法
事永圖至信理所宜然未知如何可以贊襄王事伏冀 至仁皇
帝鑒察謹上書爲永遠不絕之信誓云又伊拉古克三云噶爾丹
頂佛像設誓曰我自恃理直追索土謝圖汗澤卜尊丹巴而深入
汎界置佛天於前而不以己之罪爲罪可乎佛天以仁恕爲心

聖上卽佛天也乞鑒宥我罪凡有 諭旨謹遵行之今往界上租
水草善地無人之處駐紮候旨尋又據濟隆持噶爾丹誓書來且
述噶爾丹之言曰我蒙王及皇子大臣見憐我正懽忭伊拉古克
三來諭以永遠歸好之意我思倚 皇上以爲生今往界外駐候
聖旨臣等思噶爾丹軍敗力窮觀其語不敢抗拒 皇上天威
籲請寬宥有倚我求生之意雖不可深信旣恭順奏請伏祈睿裁
奏至命議政王大臣集議尋議噶爾丹不敢抗拒 天威設誓請

罪既獻誓書適符 皇上好生之心請准所誓今出邊候旨再檄
裕親王內大臣蘇爾達等仍俟噶爾丹出邊另行請旨撤兵 上
許之隨遣侍郎額爾賀圖等同伊拉古克三齎敕往諭噶爾丹敕
曰朕統御宇內率土人民皆欲使得其所雖窮壤異域之民亦必
撫育各享安樂此本願也前者喀爾喀爲爾所敗來歸於朕朕以
天下之人皆在朕覆育之中扶衰濟困乃元后當行之事故受而
育之並非利七旗喀爾喀之土地况朕興滅繼絕之意非第喀爾
喀爲然諸窮困來歸者一體撫而養之是亦諭爾敕中所有也爾
厄魯特喀爾喀兩相構怨何所底止必至塗炭朕與達賴喇嘛仁
愛爲心特欲使爾兩國和好罷戰共享安樂達賴喇嘛遣濟隆胡
土克圖朕遣伊拉古克三胡土克圖商南多爾濟往赴爾所爾乃
違達賴喇嘛之教及朕之旨以追喀爾喀爲名率兵入我邊汎行

劫烏朱穆秦朕雖聞之尙未深信我朝用兵越險阻踰山海以關
疆土抗拒者誅之而已無有他人入犯我境者爾噶爾丹博碩克
圖豈不知之後聞汝深入騷擾朕仍念爾向來職貢通好是以遣
和碩裕親王及皇子等授之以兵與汝共議非令討汝也爾眾先
動我兵始舉是戰之後王及大臣奏請再戰而朕止之盛京烏喇
科爾沁軍又請與戰朕又以待爾回奏而止之今爾以誓書來請
罪求和王及大臣體達賴喇嘛及朕好生之素心按兵不行追殺
爾率爾兵出界而居不得擅犯我屬下部落喀爾喀一人一畜亦
不得有一人與眾部落往來通使爾儻有窘迫奏聞於朕朕必如
前旨撫養斷不念爾舊愆若再違誓言妄行劫奪生事朕厲兵秣
馬見俱整備必務窮討斷不終止○丁丑諭議政大臣等噶爾丹
雖認罪立誓上書請降但人殊狡詐難以深信我大兵撤後背盟

妄行亦未可定且諭噶爾丹敕內有厲兵秣馬見俱整備之語仍宜發兵豫備萬一有悖畔之信則夕聞朝發即可撲滅若待有變而後發兵緩不及事矣見在各佐領有喂肥馬匹著每佐領派護軍七名甲兵五名六名整頓備之○壬午朝鮮國王李焞遵旨回奏前請封側室張氏奏內有應避諱字樣不行避諱又稱德冠後宮實屬違例惟候嚴加處分得旨李焞著從寬免議○癸未賑喀爾喀諸旗饑○丙戌吏部等衙門議覆山東巡撫佛倫奏郭琇係奉旨休致回籍之人今違旨不行回籍潛藏京城明係串通朋黨夤緣生事希圖復職又稱郭琇父郭景昌卽郭爾標原係明末賊犯正法郭琇從前蒙蔽改名請封其郭琇本身並伊親祖親父嗣祖嗣父所得誥封一併追繳應如所請嗣後革職解任漢官照旗員例勒限五箇月起程回籍如不卽行回籍仍在作官地方及或

在別處居住俱照旗員逾限例處分其地方官亦照容畱旗員例議處各京官革職解任休致臣部知照各原籍督撫仍移咨都察院轉交五城官員嚴催起程日期報部外官回籍亦行令該督撫將起程日期報部卽知會原籍地方亦令該督撫報部著爲令從之

九月癸巳內大臣都統公舅舅佟國綱以勦厄魯特陣亡靈輓將至遣額駙尙之隆內大臣公坡爾盆及侍衛等往迎之賜銀五千兩尋賜祭葬加祭三次諡忠勇大臣官員陣亡者咸遣官祭奠並賜卹有差○丁酉諭大學士等朕向聞蒙古臨陣初雖驍勇一敗北卽奔竄首尾不顧懦怯殊甚頃我兵討厄魯特厄魯特敗旋奔高山頂遁於險惡處因我軍排列太密敵人亂放鳥槍故有被傷者且進退之際海螺未鳴此皆未熟於戰陣耳從古行兵未有不

豫操練者向時八旗兵丁每歲春秋校獵比者恐馬疲於行故暫停止今春秋二季令八旗官兵集於寬敞平原之地排列陣勢鳴螺進退以熟操練○戊申停本年秋決○兵部議覆廣東廣西總督石琳奏海賊方雲龍等聚集奸徒在安南國新安嶽山諸島劫掠洋船僞稱將軍龍門副將葉昇帥兵進剿俱已擒獲應令該督嚴審定罪具奏得旨擒獲各犯俱係熟諳水性之人著從寬免死併伊妻子解送來京發往黑龍江充水手當差○壬子兵部奏民間禁養馬既不便民馬亦希少嗣後請弛養馬之禁聽從民便著爲令從之○乙卯江蘇巡撫鄭端陞辭 上曰江蘇地方繁華人心不古鄉紳不奉法者多鄭端奏曰若鄉紳肆行無忌自犯科條臣惟有執法而已 上曰爾止須公爾忘私亦不必吹毛求疵在地方務以安靜爲善○裁大名府通判一改爲保定府通判駐古

北口管驛站事○是月免直隸所屬被災逋賦及今年額賦之半
並免甘肅所屬被災賦有差

冬十月戊午朔撫遠大將軍裕親王福全等奏員外郎蒙古爾等
原解米一千二百石支給大軍外給畱後之兵扣至十月初十日
止但伊拉古克三胡土克圖侍郎額爾賀圖自八月起程月餘不
歸以此觀之噶爾丹似出邊遠遁矣駐軍以待糗糧不足請檄喀
喇沁王以車運致 上曰前王等奏言俟伊拉古克三等歸再請
旨撤兵今聞大兵前來哈嗎爾嶺以內此乃朕圍獵最熟之地距
有米之處止二百餘里離喀喇沁旣遠而欲動其兵馬以車運米
此說甚謬著議政大臣等集議尋議大將軍福全等不行請旨擅
率大軍內徙俟歸日一併察議今伊拉古克三額爾賀圖等尙未
歸應以前鋒護軍共四百名畱大將軍處其餘兵卒及火器營兵

俱令撤回以車運米之請毋庸置議應將坡賴村之糧酌量足留後兵之用所餘橐駝運往得旨著裕親王及索額圖明珠費揚古阿密達留後其餘俱令回京餘如議○己未諭大學士部院大臣等今朕躬已愈但因灼艾未御乾清門朕聽政三十年來無日不見諸大臣共相諮議今處宮中雖日理奏章未嘗廢事而與諸大臣懸隔思之如有所失且旗下引見題補諸事恐致壅滯向有大臣奏事乾清宮之例自明日始仍如常進乾清宮啟奏○辛酉諭大學士等盛京軍士皆能挽強但其地雖有筋與鯁而無牛角所以軍士難得良弓盛京既有筋鯁及工匠戶部庫內見貯牛角今年卽發角二千對運至將軍公署將軍等可監視造弓散給軍士自明年爲始每年以角一千對給發盛京將軍○壬戌給事中何金蘭奏請定御門之期或三日或五日事應面奏者仍面奏請旨

至尋常奏章交內閣照例送進 上曰朕惟致治務在精勤久道期於無斁朕躬親庶政早夜孜孜靡敢暇逸冀與大小臣工共圖熙績據奏用人行政條例具舉尋常奏章日煩臨御臣誼難安請酌定御門之期等語朕三十年來每晨聽政面見諸臣諮詢得失習以爲常今若行更改非勵精求治初終罔閒之道且與諸臣接見稍疏朕衷亦深眷念此奏不准行○癸亥發兵戍大同宣府沿邊諸路○癸酉予陣歿黑龍江防守尉鈕莫舜世職○增盛京五部理事官各一○甲戌刑部等衙門議准升任直隸巡撫郭世隆奉差福建審孫鏞首告巡撫張仲舉等十案奏稱張仲舉侵蝕庫帑擬斬監候布政使張永茂加派火耗擬絞監候按察使田慶曾等收受屬員節禮擬杖徒援赦免罪仍革職永不敘用從之○辛巳諭吏部盛京禮部侍郎朱善不能管束人員甚屬庸劣著革任

○諭大學士等凡擬撰文章係翰林官職掌理當加意詳慎文中辭意務期克肖其人何可意爲輕重今覽楊瑄所撰內大臣都統公舅舅佟國綱祭文引用王彥章事蹟極其悖謬且見所撰祭文每於旗下官員多隱藏不美之言於漢人則多鋪張粉飾是何意見爾等瞻徇情面不行改削朕豈容姑釋耶王熙等奏曰此文引用王彥章事蹟果屬悖謬 皇上所見極當臣等但一時意見未及何敢徇情 上曰此等撰文之人若不削籍流竄何以懲戒將來爾等即可題參並傳張英及撰文者以從前姚文然魏象樞葉方藹祭文與此祭文較看尋部議編修楊瑄革職發奉天入旗當差禮部尙書兼管翰林院詹事府事張英應降四級調用得旨楊瑄著依議張英著革去禮部尙書仍管翰林院詹事府事○甲申時噶爾丹敗遁出汛界伊拉古克三胡土克圖侍郎額爾賀圖等

齋敕追及之噶爾丹具奏謝罪奏曰向以一道同軌通使請安貿易往來間因喀爾喀變亂使人失詞遂生小釁兩胡土克圖來宣布諭旨使歸於好神聖垂慈不勝懼忤嗣以遠來糧畜匱乏妄行獲戾而伊拉古克三胡土克圖傳旨使全禮法仍歸和好既已加恩又許陳情心甚喜悅惟有欽遵諭旨奉行不違而已

上諭大學士等大將軍裕親王兵著撤回及防守遵化州綠旗兵亦著各歸本汛○乙酉上幸南苑行圍○以年遐齡爲內閣學

士

由宗人府
府丞遷

王士正爲督捕侍郎單璧爲盛京禮部侍郎

俱由左
副都御

遷

十一月庚寅諭大學士等本朝在盛京時阿敏貝勒以棄灤州永平之故曾取口供大貝勒差往朝鮮以不遵諭旨而行之故曾取口供又因來京兵丁鼓譟之故曾取英王等口供今王大臣回兵

已近其應取口供之處爾等會同議政大臣等查看 實錄並兵

部檔案啟奏再此際兵部正在覈議功罪所關甚大侍郎覺羅舜

拜才力不及暫停其行走此缺令倉場侍郎凱音布署理都察院

理藩院兩衙門事少令左都御史馬齊署理理藩院尚書事務○

以胡昇猷朱都納俱爲左副都御史胡昇猷由太常寺卿朱都納由內閣學士遷○己

亥以熊賜履爲禮部尚書原任○庚子以南達爲內閣學士由內閣

遷○甲辰達賴喇嘛率西海諸台吉及噶爾丹等具奏請上 尊

號命議政王大臣會議王大臣議從所請納其貢物 上諭朕統

御宇內冀中外人民咸無戕賊共享昇平是以前聞喀爾喀七旗

兄弟不睦時遣使於達賴喇嘛欲使歸好達賴喇嘛遣噶爾丹西

勒圖朕遣尚書阿喇尼前往而伊等所行不能仰體朕心及達賴

喇嘛之意雖已和喀爾喀七旗而喀爾喀與厄魯特相仇之故實

從此起後交惡興戎卽遣使於達賴喇嘛達賴喇嘛遣齊緝克他
賴堪布朕遣阿齊圖綽爾濟學士拜禮等止彼相攻乃伊等不行
宣諭止之聽其縱戰喀爾喀遂爲所敗朕不忍坐視復遣使達賴
喇嘛相與同定兩國之好達賴喇嘛遣濟隆胡土克圖朕遣伊拉
古克三胡土克圖往說之詎意兩人見噶爾丹不行諭止與之偕
行闌入汛界搶奪人畜朕出兵問罪而兩人又不爲諭止立視其
戰我軍不得已而擊之致厄魯特大敗遠遁請罪朕與達賴喇嘛
期於撫育眾生而使臣故違意旨遂至於此如能使厄魯特喀爾
喀兩國和好朕尙欲加達賴喇嘛嘉號此皆任人行事不能仰副
朕心是以喀爾喀殘破厄魯特喪敗朕心甚爲隱痛有何可賀而
受尊號乎其以是曉諭達賴喇嘛諸汗眾台吉來使貢禮賀物其
併發還○己酉烏闌布通出征王大臣等回京命止朝陽門外聽

勘皇子允禔以議政王大臣等取供時應如何具供奏請 上諭
裕親王係汝伯父議政王大臣等取供時汝若與裕親王稍有異
同朕必實汝於法斷不姑容裕親王福全初亦錄皇子允禔軍中
過惡欲於取供時告白至是議政王大臣等會同取供允禔云我
與伯父裕親王供同裕親王聞之俯首良久流涕曰我復何言遂
直引爲己罪兩人全親親之誼皆 上德意所致也○信郡王鄂
扎等奏 皇上深慮噶爾丹奸狡此役不行剿除必貽後患多派
精兵盡發火器以裕親王福全爲大將軍王大臣爲參贊指授方
略務期盡滅根株乃福全等調度乖方既經戰勝不能乘機剿滅
收兵又不鳴笳賊敗不行追殺反行文禁止蘇爾達等進兵以致
窮寇逃遁殊誤軍機且未經請旨率兵擅回哈嗎爾嶺內應將裕
親王福全恭親王常甯簡親王雅布俱革去王爵福全撤去三佐

領內大臣公舅舅佟國維內大臣索額圖明珠阿密達俱革職都
統公彭春前鋒統領班達爾沙護軍統領楊岱苗齊訥俱解任都
統宗室蘇努喇克達都統阿席坦諾邁俱不准敘功內大臣蘇爾
達費揚古都統希福副都統塞赫羅滿色俱罰俸一年散秩大臣
查努喀革職得旨噶爾丹於烏闌布通爲我軍擊敗遁走而領兵
諸王大臣不復追殺反信濟隆胡土克圖議好之誑詞遣人語內
大臣蘇爾達等令盛京烏喇諸路兵勿與之戰是以噶爾丹奔竄
過盛京烏喇科爾沁軍營竟不邀擊縱之使去其時蘇爾達欲羈
縻噶爾丹與土謝圖親王沙津達爾漢親王班第等公同商議選
遣公主之子阿拉善下人阿漆爾及郭爾羅斯台吉吳爾圖約蘇
圖旗下佐領祈他邁往令噶爾丹且止將與之會語噶爾丹不少
畱倉皇宵遁如使蘇爾達等邀擊之則噶爾丹可以就擒矣伊等

不戰乃大誤也福全等俱應依議治罪但此舉已擊敗厄魯特兵噶爾丹遠遁諸王大臣概從寬免革福全常甯罷議政與雅布俱罰俸三年福全撤去三佐領佟國維索額圖明珠蘇努喇克達阿錫坦諾邁俱罷議政與阿密達彭春班達爾沙楊岱苗齊訥各降四級畱任蘇爾達費揚古希福俱免罰俸塞赫羅滿色俱罰俸一年查努喀著革職火器營左翼戰功照常議敘尋兵部議敘以火器營官兵及左翼交戰將士爲頭等軍功從之○丙辰予故原任中和殿大學士巴泰祭葬諡文恪○是月免雲南新興河陽二州直隸武清薊州五州縣浙江餘姚等五縣水災額賦有差

十二月己未噶爾丹奏自喀爾喀變亂以來貿易不行籲請恩賜白金以育眾庶理藩院及議政大臣議無賜白金之例上曰噶爾丹籲請懇切著賜白金千兩○庚申上謁陵啟鑒上欲

臨舅舅修國綱塋舅舅修國維率子姪奏曰臣兄效力陣亡乃人臣所當然亡者如果有知 皇上此臨不但臣兄之魂未安臣父母之魂亦必不安 皇上斷不可臨免冠再三叩請 上遂止遣皇子允祉奠酒○癸亥 上謁 暫安奉殿○甲子 上謁孝陵至 仁孝皇后 孝昭皇后 孝懿皇后陵奠酒○壬申上出龍井關駐蹕蘭陽口北○丁丑 上還謁 暫安奉殿率諸王大臣等行 孝莊文皇后三替致祭禮是日回鑾○庚辰 上還京師○是月免江南六合江都等十七州縣水災賦○是歲朝鮮來貢○人丁戶口二千三十六萬三千五百六十八田地山蕩畦地五百九十三萬二千六百八十四頃二十七畝有奇徵銀二千七百三十七萬五千二百八十九兩有奇米豆麥六百九十五萬二百八十一石有奇草二百二十五萬二千八百四十一束茶

十六萬五百九十八引行鹽四百三十五萬六千一百五十引徵
課銀二百七十六萬六千九百九十七兩有奇鑄錢二萬八千九
百九十三萬六百有奇

東華錄

康熙四十七

臣王先謙敬編

臣周澐蕃恭校

康熙三十年辛未春正月戊申封阿祿科爾沁貝勒楚依爲郡王以與厄魯特力戰受傷被執不屈也○論扎魯特阿祿科爾沁等十二旗陣亡台吉功俱贈一等台吉賜號達爾漢令其子承襲○噶爾丹復自俄僂向喀爾喀墨爾根濟農來犯上命瓦岱爲定北將軍駐張家口都統郎談爲安北將軍駐大同備之○庚戌內閣學士田喜霽丁母憂命回籍守制○辛未上幸南苑行圍○王子諭大學士等聞噶爾丹劫掠墨爾根濟農巴圖爾額爾克濟農向青海而去著將陝西西安兵酌留守城外其餘兵丁命將軍親率之川陝督標綠旗兵命總督親率之甯夏鎮標兵命總兵官

親率之俱於甯夏備噶爾丹致仕勇畧將軍趙良棟見在甯夏熟習軍務令與將軍總督酌議行事又諭宣府大同兵雖未嘗攻戰而兩次出邊修整器械亦已勞矣今又令將軍等於有事時便宜

率之而行宜加恩賚每兵著賞銀四兩○癸丑上還宮○乙卯

以馬齊爲兵部尙書

由左都御史遷

班迪爲理藩院尙書

由內大臣遷

○轉傳

臘塔爲刑部左侍郎以布彥圖爲刑部右侍郎

由內閣學士遷

李元振爲

左副都御史

由太常寺卿遷

二月丁巳朔日有食之○諭大學士等京師爲輦轂重地人民商

賈四方輻輳京城內外統轄必有專責俾稽察奸宄消弭盜賊然

後商民得以安堵今城內地方旣屬步軍統領管理城外巡捕三

營又屬兵部督捕衙門管轄內外責任各殊不相統攝遇有盜案

反難查緝嗣後巡捕三營亦令步軍統領管理京城內外一體巡

察責任既專則於芟除盜賊安輯商民庶有裨益其三營事務作

何歸併管理著九卿詹事科道會同確議具奏○戊午以王尹方

爲內閣學士

由翰林院侍讀學士遷

○策妄阿喇布坦及阿奴等遣使達爾

漢囊素奏與噶爾丹交惡始末理藩院以聞

上命厚加恩賜而

遣之並令郎中桑額護其行其使人起行之先令見噶爾丹來使

告以故○庚申以山東布政使衛既齊爲順天府府尹○乙丑

上御經筵○以傅繼祖爲內閣學士

由內閣侍讀學士遷

○丁卯諭大學士

伊桑阿阿蘭泰尙書馬齊班迪等侍衛阿南達來奏噶爾丹去年

敗走以來日以北徙人畜屢斃劫掠無所獲近者噶爾丹親率兵

來劫喀爾喀至阿爾哈賴地方又無所得皆徒步而返困敝已極

今應於見在此地噶爾丹使人內撥發數人令巴把爾齋敕乘驛

與之同往噶爾丹所至巴圖爾額爾克濟農墨爾根濟農善巴額

爾克戴青處各遣官一員令伊等皆內徙速置哨探再語伊拉古克三胡土克圖令明告噶爾丹使人云汝輩厄魯特之人從噶爾丹而行失其生計主上憐之故遣汝等傳諭噶爾丹若降當厚加恩養若上果念汝等厄魯特前惡則不令策妄阿喇布坦使人見汝等矣巴圖爾額爾克濟農遣二郎保去墨爾根濟農善巴額爾克戴青著與阿南達議亦遣向日往來相識之人去○賜噶爾丹敕曰朕爲天下一統主務使四海之內人民咸獲其所以享太平雖向與本朝抗拒之國如窮迫來歸必拯而養之無不使得其所者喀爾喀尙曾與本朝交戰窮而來歸朕並不念其前罪受而撫養之朕濟困繼絕之心不但於喀爾喀爲然也諸國有窮迫來歸者朕之撫養皆與此同前已有旨諭汝矣今聞喀爾喀逃來人等言汝厄魯特牲畜已盡無以爲食極其窮困人被疾疫死亡相繼

朕重念天下率土人民之命聞此困敝有不惻然軫念者乎況前
已有旨諭達賴喇嘛言噶爾丹如不得已而來歸朕亦受而養之
使之得所今果窮困無食不能歸故土其移近邊汛朕當厚加恩
賜如決計入降益從優撫養斷不至失所此朕俯視率土人民一
體之實心勿貳勿疑汝亦曾誓不侵擾喀爾喀況我軍已在在設
備矣若朕果有蹙汝窮困之事則不使策妄阿喇布坦使人見汝
之人如此情事汝使亦皆知之自此以後汝之人無所劫奪不能
歸故土眾庶益致死亡雖悔莫及汝當熟籌之其定計具本來奏
○戊辰以楊廷耀爲山東布政使喻成龍爲山東按察使由鹽運使遷
○九卿等遵旨議覆京師輦轂重地應將巡捕三營歸併步軍統
領管轄督捕都察院五城所管事宜俱交步軍統領管理其三營
一應拏獲逃盜等犯令該統領移送督捕刑部完結應換給提督

九門步軍巡捕三營統領印信從之○甲戌予故兵部督捕右侍郎許三禮左副都御史胡昇猷祭葬○乙亥予故昭武將軍江南提督贈少傅兼太子太傅楊捷祭葬諡敏壯○吏部等衙門議准給事中鄭昱奏凡內文武官寄寓他省除革職提問者仍照例勒限驅逐回籍外其餘解任休致丁憂各官懇免驅逐聽其自便得旨奉天四川回籍官員仍照見行例行餘依議○是月免直隸保安州前年旱災賦

三月戊子繙譯通鑑綱目成 御製序文曰朕惟自古帝王御世大經大法莫備於史唐虞三代之史尙書所載典謨訓誥皆是也自仲尼因魯史作春秋始編年繫月紀載之中褒貶寓焉大要歸於扶植綱常闡揚道法後之言史者必宗之宋司馬光奉詔纂修資治通鑑論者以爲博而得其要簡而周於事朱熹本之爲綱目

綱倣春秋目倣左氏義例森嚴首尾條貫足以示勸懲而昭法戒
煌煌乎典章之總會而治道之權衡也前編則上溯羲皇徵引經
傳足備稽考續編則下逮於宋遼金元其中敘事雖間得其實然
而議論偏私紀載乖舛往往有之視朱熹所撰綱目迥乎其不侔
矣朕撫御宇內夙夜兢業每思說命之言曰學於古訓乃有獲朕
於萬幾之暇潛心六經大義微言孜孜殫究以講求古帝王治天
下之大道於綱目一書朝夕起居之時循環披覽手未釋卷以是
考前代君臣得失之故世運升降之由綱紀法度之所以立人心
風俗之所由純事有關乎典常言有裨乎治體者靡不覓委窮源
詳加論斷如是者有年矣爰於內廷設立書局命繙譯呈覽朕躬
親裁定爲之疏解務期曉暢無遺歸於至當而後止立有程課自
元旦以至歲除未嘗有一日之閒卽巡幸所至亦必以卷帙自隨

迄今三年有餘全集告竣將鐫梓頒行儒臣請序其端朕念是編所記述皆有關於治天下國家之務非等於尋常記載之書法戒昭然永爲金鑑凡我臣工其各殫心觀摩以體朕黽勉法古之意且垂之奕世使子孫臣僚莫不奉爲典型酌乎治理斯作君之道出其中而作師之道亦出其中矣是又朕惓惓此書之意也夫○乙未先是給事中博爾濟奏盛京府州縣俱設立學校考取士子盛京左右兩翼亦應各設官學酌選俊秀幼童設立滿漢官教習滿漢書馬步箭卽於盛京各部衙門筆帖式烏林大缺出補用得旨京師八旗各佐領下幼童由各佐領內擇其優長之人令其教習讀書及馬步箭著九卿一併議奏至是九卿議覆盛京係發祥重地教育人材宜與京師一體應如博爾濟所題盛京左右兩翼各設官學二處將彼處俊秀幼童各旗選取十名每翼四十名滿

學各二十名教讀滿書習馬步箭漢學各二十名教讀滿漢書習馬步箭交與盛京禮部堂官不時稽查操演如盛京有各部衙門筆帖式烏林大缺出照例補用滿學設滿文助教各一員漢學設通滿漢文助教各一員俱由吏部考授其漢學令奉天府尹於盛京生員內擇其才學長者各二名令其教讀學舍由盛京工部撥給至京師八旗子弟讀漢書者考取生員舉人進士時仍令射馬步箭能者方准作文考試其餘幼童十歲以上者各佐領於本佐領內選優長者各一人滿洲旗分幼童教習滿書滿語蒙古旗分幼童教習滿洲蒙古書滿洲蒙古語漢軍幼童教習滿書滿語並習馬步箭仍令各佐領驍騎校稽查將此學名爲義學從之○庚子設盛京兵部衙門侍郎一理事官一郎中二員外郎六滿字堂主事一翻譯主事一滿字筆帖式八翻譯筆帖式四○辛丑以張

志棟爲福建按察使

由山西冀甯道遷

○兵部議覆甘肅提督孫思克奏

肅州係邊疆要地請改設總兵官以壯邊勢應如所請肅州設立總兵官一增兵二千一十五名合協標舊兵立中左右三營每營設遊擊一守備一千總二把總四從之○己酉賜戴有祺等一百四十八人進士及第出身有差○甲寅調覺羅舜拜爲盛京兵部侍郎

由兵部調

○以孟卜爲浙江按察使

由直隸通永道遷

夏四月戊午轉沙穆哈爲兵部左侍郎以朱都納爲兵部右侍郎

由左副都御史遷

○先是革職縣丞譚明命叩閭控吏部主事朱敦厚前

任濰縣知縣時婪贓四萬餘兩下山東巡撫佛倫鞠勘佛倫奏朱敦厚加派婪贓經前任巡撫錢珏鞫審已得實據因朱敦厚跪求原任刑部尙書徐乾學貽書錢珏徇情檄行布政使衛旣齊銷案除朱敦厚依律擬罪外徐乾學等並請敕部議處事下吏部及三

法司議至是覆奏朱敦厚應絞原任山東布政使今升順天府府尹衛既齊照徇庇例降三級調用原任刑部尙書徐乾學原任山東巡撫錢珏並應革職譚明命係大計被參貪官仍不敘用得旨衛既齊著照見任降三級免其調用徐乾學錢珏俱革職餘如議

○丙寅以多弼爲左副都御史

由光祿寺卿遷

○丁卯

上欲巡察邊外

蒙古等生計又以喀爾喀地居極北曩雖進貢未嘗親身歸順今土謝圖汗等親率所屬數十餘萬人來歸特往撫綏安輯是日啟鑾○戊辰諭所過勿踐麥田○庚午次古北口閱兵○乙亥以董安國爲貴州布政使

由四川按察使遷

○辛巳以趙良璧爲四川按察使

由浙江甯台道遷

○乙酉

上駐蹕多羅諾爾○是月免陝西吳堡等三

縣逋賦

五月丙戌朔先是遣內大臣索額圖一等侍衛吳達禪諭土謝圖

汗澤卜尊丹巴胡土克圖曰是盟也朕躬與蒙古諸王貝勒貝子公七旗喀爾喀會集爾等可將殺得克得黑墨爾根阿海及在喀爾喀妄爲之事於朕未至以前自行陳奏土謝圖汗澤卜尊丹巴胡土克圖等隨各具奏請罪至是馬齊等奏土謝圖汗澤卜尊丹巴胡土克圖等盡壞喀爾喀生計致起兵端其引罪之奏妄稱扎薩克圖汗得克得黑墨爾根阿海背喀爾喀依附噶爾丹博碩克圖因用兵擊殺之巧辭掩飾殊屬不合應將土謝圖汗削去汗號爲閒散台吉澤卜尊丹巴胡土克圖削去名號爲小喇嘛仍令土謝圖汗管轄上曰土謝圖汗兄弟內相構怨託征厄魯特起兵遂殺扎薩克圖汗使喀爾喀百姓流離皆其所致但伊曾遣使來奏云我欲附天朝惟恐不蒙容納然歸附之意已決今果率眾來歸朕故不忍治罪馬齊等又奏扎薩克圖汗乃喀爾喀七旗之長

累世抒誠進貢扎薩克圖汗名號似應仍令承襲 上曰扎薩克圖汗在日抒誠進貢若其子巴朗額爾克海尙在卽應襲封但今已亡故而見在之子幼穉扎薩克圖汗之親弟策妄扎卜眾皆稱其賢意欲封爲親王明日以此意諭眾喀爾喀等至車臣汗我朝已經襲封可仍存其汗號○理藩院奏遵旨酌定喀爾喀坐次應令土謝圖汗澤卜尊丹巴胡土克圖扎薩克圖汗弟策妄扎卜車臣汗坐第一行餘分七行以次序坐從之尋命喀爾喀七旗與四十九旗同例○丁亥 上命土謝圖汗澤卜尊丹巴胡土克圖進行幄朝見土謝圖汗跪奏曰蒙 聖主殊恩臣等垂死之軀今得更生不能縷析敷奏惟願仰賴 聖主恩庇自此安樂得所澤卜尊丹巴胡土克圖跪奏曰仁德高峻養育羣生宏施利益者謂之佛臣等蒙 聖主大沛洪恩特加拯救是卽臣等得遇活佛也惟

祝 皇上萬壽無疆 上賜二人茶又賜土謝圖汗數珠一串隨命大學士伊桑阿等傳諭喀爾喀等眾曰爾等七旗喀爾喀兄弟不睦朕特遣大臣會閱令將互相吞噬之人民各行給還誓言已定土謝圖汗等自食其言託征厄魯特起兵將扎薩克圖汗等得克得黑墨爾根阿海執而殺之從此喀爾喀等心志攜貳以致國土敗亡生計遂失然雖窮困已極但能思朕夙昔愛養之恩來求歸附朕仍一體養育今土謝圖汗等將一切大過自行陳奏當此大閱之時若卽懲以重罪豈惟朕心不忍爾等七旗能無愧於心乎若以輕罪處之目今生計全失俱賴朕惠養何從議罰故將伊等責其大過復原恕其情至扎薩克圖汗抒誠進貢業已有年無故爲土謝圖汗等殘害殊爲可憫今其親弟策妄扎卜來覲應卽令承襲以示優恤諭畢喀爾喀汗大小眾台吉同奏曰土謝圖汗

等蒙 聖主寬恕其罪又念扎薩克圖汗所屬人民散失將伊弟策妄扎卜恩令襲封誠爲曠典臣等不勝懼忭感激惟仰祝於天而已奏入 上御行宮前黃幄升座喀爾喀汗台吉等行三跪九叩禮畢以次序坐樂作大宴喀爾喀車臣汗及第二班次扎薩克之墨爾根濟農古祿西希等十四濟農台吉第三班扎薩克之魏徵諾顏阿玉錫等十三大台吉俱令近 御座前 上親賜酒餘皆令侍衛等分賜之○戊子賜喀爾喀土謝圖汗澤卜尊丹巴胡土克圖扎薩克圖汗弟策妄扎卜車臣汗銀各千兩蟒段綵段各十五疋及銀器袍帽茶布諸物又賜濟農台吉等銀段諸物有差○復召喀爾喀土謝圖汗策妄扎卜車臣汗澤卜尊丹巴胡土克圖及濟農台吉等三十五人賜宴 上諭昨日雖已賜宴朕復欲熟識爾等故特召入俾各陳所欲言爾等舒懷共語以饗斯宴勿

因在朕前過於拘束也土謝圖汗車臣汗等奏曰 聖主如此深
仁臣等恨歸順之晚耳惟願 聖壽萬年俾臣等仰沐洪恩長享
太平之福宴畢 上以策妄扎卜年幼以皇子所服衣帽數珠賜
之○諭喀爾喀汗濟農台吉等朕承天命統御萬方惟思率土人
民咸得其所安生樂業不致淪於滅亡中外同觀罔有殊別前爾
七旗喀爾喀等本皆兄弟乃互相爭奪吞噬人民以致不睦朕因
此故會特遣大臣往莅會所令爾等各相和協而土謝圖汗自食
誓言不遵約會已定之議起釁用兵致爲厄魯特噶爾丹博碩克
圖所敗喪其國土汗台吉等不能保聚所屬人民其人民亦不能
各保妻子紛紛潰散來求歸附爾等當此困窮至極之際儻朕之
眾扎薩克等各行收取爾喀爾喀早已無遺類矣朕好生之心本
於天性不忍視爾等之滅亡給地安置復屢于牲畜糗糧以資贖

養汗台吉仍留如故車臣汗仍令承襲又因爾等互相偷奪故於各處添設管轄扎薩克以便稽察且念爾等素無法紀故頒示定例令各遵行自古以來未有如朕拯救愛養若此者也朕既加愛養更欲令爾等甦息繁育用是親臨訓諭大行賞賚會同之時見爾等傾心感戴故將爾等與朕四十九旗一例編設其名號亦與四十九旗同以示朕一體仁愛之意土謝圖汗車臣汗名號俱著仍舊存留扎薩克圖汗無辜被殺且所屬人民離散困苦已極深爲可憫著將伊親弟策妄扎卜封爲和碩親王其扎薩克之墨爾根濟農古祿西希扎薩克之崑都崙博碩克圖滾卜扎薩克之信順額爾克戴青諾顏善巴扎薩克之台吉色冷阿海扎薩克之額爾德尼濟農盆楚克喇布坦伊等原係舊扎薩克著去其濟農諾顏之名皆封爲多羅郡王其台吉噶爾旦係土謝圖汗之長子且

從枯倫白爾齊爾期會以後屢來朝貢著封爲多羅郡王車臣汗之叔扎薩克額爾德尼濟農納穆扎爾雖係新扎薩克而勸車臣汗領十萬眾歸順又身爲之倡奏請照四十九旗一例殊爲可嘉著照舊扎薩克例去其濟農之名封爲多羅郡王車臣汗之族叔扎薩克額爾克台吉車布登當征厄魯特之際效力行走偵探信息以馬匹助用於事不致有誤著授爲多羅貝勒台吉西第西里土謝圖汗之親弟且所屬甚眾同土謝圖汗歸順著授爲多羅貝勒車臣汗之叔祖車臣濟農車卜登達賴濟農阿南達額爾德尼濟農布達扎卜伊爾登諾顏達禮車臣汗之叔伊爾登濟農益蘇克皆去其濟農之名授爲固山貝子白蘇特之察罕巴爾諾顏博貝布扎雖係新扎薩克當在喀爾喀地方時曾奏喀爾喀日後必敗敗時我來投歸天朝後喀爾喀國敗卽踐前言歸順殊爲可嘉

亦著授爲固山貝子洪俄爾戴青之佐理固山事台吉漢都歸順
在眾人之先效力行間被創著授爲鎮國公土謝圖汗之同族台
吉蘇泰伊爾登額爾克戴青諾顏善巴之同族台吉托多額爾得
尼等誠心歸順效力行間此二人亦著授爲鎮國公此外在事台
吉與眾台吉等著該部一一察明具奏各與以應得品級自今以
往爾等體朕愛養之恩各守法度力行恭順如此則爾等生計漸
蕃福及子孫世世被澤若違法妄行則爾等生計既壞且國法具
在凡事必依所犯之法治罪特諭○己丑 上出行宮御甲冑乘
馬徧閱隊伍回下馬樹侯 上親射發十矢九中次命十五善射
並硬弓侍衛等射 上御黃幄四十九旗王貝勒貝子台吉及喀
爾喀土謝圖汗台吉等跪奏云 皇上御甲冑發十矢九中洵神
武也隨大閱軍容八旗滿洲官兵漢軍火器營官兵又總兵官蔡

元標下官兵各依次列陣鳴角鳥槍齊發眾大呼前進聲動山谷
喀爾喀土謝圖汗台吉等悚懼失措有欲趨避狀 上笑諭曰此
不過示爾等以軍容耳何懼之有土謝圖汗奏曰 皇上軍威赫
濯如此臣等不禁徬徨失措矣事畢各賜茶 上還行宮○科爾
沁土謝圖親王沙津等率四十九旗王貝勒貝子公台吉等合奏
請上 尊號 上諭大學士等吳三桂既平之後諸王大臣請上
尊號未嘗准行今豈可許乎其以此諭王等知之○賜四十九
旗王貝勒貝子公台吉等冠服白金○庚寅 上親閱喀爾喀營
寨其窮困者賞以銀布又大賚喀爾喀貝勒貝子公台吉等牛羊
○辛卯遣原任尚書阿喇尼侍郎布彥圖索諾和文達學士達虎
等往編喀爾喀旗分佐領撥給遊牧地方○壬辰奉差議事兵部
尚書馬齊等奏阿霸垓台吉奔塔爾首告烏朱穆素親王蘇達尼

之妻順附噶爾丹一案查蘇達尼之妻及台吉車根阿穆爾充科
阿達里羅雷喇扎布等順附噶爾丹是實俱應卽行處斬蘇達尼
之妻應革封號撤去所屬之人蘇達尼已故應革去親王不准承
襲二等台吉博託和喇扎布阿喇西博羅特及爲嚮導綽克圖等
曾送馬匹牲畜順附噶爾丹是實俱應卽行處斬妻子入官撥什
庫阿爾塔等爲噶爾丹指路往來問訊送驘駝馬匹皆實俱應卽
絞其妻子應作何處治交與該部議奏博羅特乃應行正法之人
護衛巴扎爾伊白葛爾將博羅特明知故縱使之逃走應照律卽
行處絞貝勒畢魯瓦將重罪之博羅特不交付的當之人嚴行看
守應罰俸一年博羅特應傳諭四十九旗嚴行查究獲日卽行正
法得旨車根等應俱依議治罪從寬免籍沒家產及撤所屬之人
惟將本身正法蘇達尼並未知情從寬免革親王仍與伊子承襲

巴扎爾伊白噶爾俱從寬免死並籍沒著穿耳鼻示眾鞭一百畢
舊瓦罰俸一年餘如議○召土謝圖汗澤卜尊丹巴胡土克圖等
賜食並各賜金盤盞碗及御用帳房等物又賜澤卜尊丹巴胡
土克圖鞍馬一匹上回鑾留兵部尙書馬齊料理會閱事畢來
京○四十九旗王貝勒貝子公台吉等跪路左喀爾喀土謝圖汗
車臣汗及王貝勒貝子公台吉等跪路右駕過喀爾喀土謝圖
汗車臣汗王貝勒貝子公台吉等皆依戀不已伏地流涕上諭
朕欲攜爾等至京師路遙天暑爾等生長北邊恐不習內地水土
朕再出邊時卽召爾等來見也又諭四十九旗王貝勒貝子公台
吉等邊外無城郭牆垣故不肖之人易於偷盜聞比年以來此風
日熾馬牛牲畜多被攘竊邊外蒙古俱賴畜牧爲業其家有牲畜
可以資生之人恐被偷盜各將牲畜圈繫不行放牧必致瘦斃如

此則雖可以資生之人亦必致窮蹙而貧富同歸於困苦矣爾等
宜不時曉諭所屬之人嚴加禁止使盜賊永息各安生業以副朕
中外一體至意○諭扈從諸臣昔秦興土石之工修築長城我朝
施恩於喀爾喀使之防備朔方較長城更爲堅固○癸卯 上還
京師○甲辰倉場侍郎李廷松以不職解任○乙巳吏部尙書張
士甄降三級調用以考察雲南山西陝西湖廣四省學道駁查違
例巧飾具奏也○丙午工部等衙門議准古北口總兵官蔡元奏
古北口一帶邊牆傾塌甚多請行修築 上諭大學士等蔡元所
奏未諳事宜帝王治天下自有本原不專恃險阻秦築長城以來
漢唐宋亦常修理其時豈無邊患明末我 太祖 太宗統兵長
驅直入諸路瓦解皆莫敢當可見守國之道惟在修德安民民心
悅則邦本得而邊境自固所謂眾志成城者是也如古北喜峯口

一帶朕皆巡閱概多損壞今欲修之興工勞役豈能無害百姓且
長城延袤數千里養兵幾何方能分守蔡元見未及此其言甚屬
無益諭九卿知之○辛亥禮部等衙門遵旨會議御史江蘩奏科
場事宜查會試之分南北中卷原爲因地取才起見行之既久其
勢不能均平若不稍加變通恐遐方士子不能仰承 皇上廣興
文教樂育人材至意嗣後應於南北中卷內再分江南浙江爲南
左江西湖廣福建廣東爲南右直隸山東爲北左河南山西陝西
爲北右四川雲南爲中左廣西貴州爲中右仍照定例合計卷數
之多寡憑文取中旣於科場條例並無更改又於各省中額不致
偏枯至安廬鳳三府滁和徐三州改歸南卷並仍行分經之處俱
照禮部原議從之○壬子大學士等奏 皇上聖德神功無遠弗
屆喀爾喀素稱不馴自 太祖 太宗 世祖皇帝時以迄於今

雖貢獻之使不絕於道而汗等恃其部族人民數十萬眾未嘗躬修臣節邇乃傾心臣服願列屬藩 皇上察其誠懇編立旗分與我四十九旗等量功授秩賞賚頻加懷柔遠人之道至斯極矣允宜誕膺 尊號式昭鉅典以愜輿情得旨喀爾喀原係進貢之國伊等不和知其必敗曾特遣大臣諭令和好后乃渝約與厄魯特構兵窘迫來歸朕以好生之心撫綏養育曲盡周詳因此懇切抒誠願同四十九旗一例蓋理所必然且比年來旱澇頻仍民生猶未蘇息風俗猶未醇厚奢靡猶未盡止朋黨猶未悉除彼此援引陷害猶未屏絕理應時加黽勉殫心竭力尙恐不逮居然以爲至治遽受尊號斷爲不可卿等所奏已知之○癸丑以山西布政使布喀爲光祿寺卿

六月乙卯朔諭大學士等喀爾喀厄魯特諭和之舉朕與達賴喇

嘛同行之今喀爾喀已安插得所應遣使齎敕於達賴喇嘛使人所關緊要商南多爾濟旣病著丹巴色爾濟去諭達賴喇嘛敕曰朕統御寰區以仁育爲本撫養是先雖末陲異域之民有困窮而歸命者必受而養之使各得其所爾喇嘛奉行佛法廣度眾生而救苦難其心亦猶是也前以七旗喀爾喀兄弟內相侵奪外與厄魯特交兵朕與爾喇嘛諭令罷兵歸好後噶爾丹又追侵土謝圖汗澤卜尊丹巴胡土克圖殺奪喀爾喀之人朕遣伊拉古克三胡土克圖爾喇嘛遣濟隆胡土克圖往諭噶爾丹爾使人不能仰副朕與爾之心噶爾丹稱兵大舉殺掠喀爾喀深入我邊汛之內朕稍發兵以問其故反與我兵拒戰至於大敗乘夜遠遁此彼來犯我非朕往伐之也被所行違朕與爾好生善念自求窮困已喀爾喀土謝圖汗車臣汗諸濟農諾顏台吉決志內附朕旣已受而養

之於本年四月躬親大閱喀爾喀之汗濟農諾顏台吉等皆執臣
禮跪而稽顙諄請與四十九旗同列朕設大宴厚賜之照四十九
旗編爲旗隊給地安插土謝圖汗自以妄舉興戎陳情請罪朕發
眾喀爾喀議之皆言加彼之罪則於眾無光朕是以宥免其罪仍
留土謝圖汗車臣汗之號又念扎薩克圖汗被殺冤痛屬下裔民
散亡可矜授其親弟策妄扎卜爲和碩親王其餘各分等級授以
郡王貝勒貝子公台吉之銜明其法度昭其典章矣爾喇嘛普濟
生靈向以喀爾喀國破爲憂今已安措得所遣使諭爾喇嘛知之
爾喇嘛聞此必大歡喜也其左翼之喀爾喀無復可議至右翼扎
薩克圖汗屬下人等被擄散亡有在爾喇嘛所者亦有在他處者
爾喇嘛普濟生靈必能查明發歸原主也今厄魯特人等屢有歸
降聞噶爾丹窮困已極無食而饑於此可見噶爾丹之獲罪於天

矣未必不往歸爾喇嘛若果往歸作何措置惟爾喇嘛裁之噶爾丹遁去之時曾立誓而去儻違誓而稍犯喀爾喀降人朕必發大兵分路前進務期剿滅之其時地方遙遠不及遣人齎敕於爾喇嘛亦未可定是以豫遣教習唐古特文喇嘛丹巴色爾濟諭爾知之○先是喀爾喀扎薩克丹津額爾德尼台吉奏厄魯特巴圖爾額爾克濟農劫其屬裔馬畜等物下議政大臣等集議至是議政大臣等議奏巴圖爾額爾克濟農前被噶爾丹劫掠窮迫來歸我皇上加恩給地安插乃巴圖爾額爾克濟農不思報 皇上覆載之恩反要劫降人喀爾喀丹津額爾德尼人畜什物應將巴圖爾額爾克濟農等遷至四十九旗地方安插兵部理藩院各遣官一員諭將軍尼雅翰率領甯夏所備西安滿兵全軍並令總兵官一員酌率綠旗官兵會同前往巴圖爾額爾克濟農所將喀爾喀

丹津額爾德尼等被劫人畜什物俱照數追還尼雅翰等率兵押

送巴圖爾額爾克濟農至歸化城交將軍郎談押護內送如巴圖

爾額爾克濟農等不還所奪人畜什物不肯內徙安插卽令尼雅

翰等率大兵勦滅之奏入 上從之隨遣兵部郎中格什理藩院

員外郎二郎保前往○調李天馥爲吏部尙書由兵部調以石文桂爲

倉場侍郎原任○壬戌封皇三女爲和碩榮憲公主下嫁巴林鄂齊

爾郡王子吳爾袞授吳爾袞爲和碩額駙○癸亥調杜臻爲兵部

尙書陳廷敬爲刑部尙書由工部調○以索諾和爲左都御史由吏部左侍郎

遷○以郭洪爲山西布政使由給事中遷○甲子內閣學士南達海以

老疾乞休允之○辛未以高爾位爲工部尙書由刑部左侍郎遷○調布

彥圖爲吏部右侍郎由刑部右侍郎調以滿丕爲內閣學士由內閣侍讀學士遷○以丹

達禮爲貴州按察使由陝西甯夏道遷○戊寅以邁塗爲刑部右侍郎由內

閣學士遷○庚辰予故原任保和殿大學士成克鞏祭葬○壬午增設理藩院員外郎八○以李迴爲刑部右侍郎

由左副都御史遷